

# TESTEMONI blong Itan

## I Kam long Lari Hila

I kamaot long wan tru stori

*"Lisin, lisin. Bae Tabu Spirit i toktok kwaet long yu. Lisin, lisin long kwaet smol voes (Children's Songbook, 106).*

Itan i sidaon long taem blong sering taem mo lukluk i go long bes fren blong hem Sam i stap serem testemoni blong hem. Fren blong hem, Sara, i stap sidaon antap long stan, i stap wet long taem blong hem. Sam i tokbaot wan seves projek we hem i bin mekem. Hem i gat wan testemoni long saed blong givim seves. Sara i talem testemoni blong hem long saed blong ol famli. Tija blong Itan tu i bin serem testemoni blong hem. Hem i tokbaot tempol wok. Evriwan long olgeta oli testifae se Jos i tru. I luk olsem se evriwan i gat wan testemoni, be Itan i no gat.

"?Mi gat wan testemoni long saed blong wanem?" Itan i askem hemwan.

Hem i tingtingbak long sam yia i pas, taem hem mo ol fren blong hem oli bin baptaes. Praemer i tija blong hem, Sista Kolda, i bin givim wan toktok long saed blong Tabu Spirit.

"Tabu Spirit i save givim yu wan filing we i bon insaed long hat blong yu. Hem i save helpem yu blong save wanem we i tru," tija i talem. "Mo hemia nao wei we yu kasem wan testemoni long saed blong wanem yu stap biliv long hem."

Itan i traem blong mekem wanem we i raet blong hem i save filim Tabu Spirit. Hem i ridim ol skripja mo

*I luk olsem se evriwan i gat wan testemoni, be Itan i no gat.*



prea. Be hem i neva gat filing ia we i mekem hat i bon olsem ol pipol oli tokbaot. ?Hemia i minim se hem i no gat wan testemoni?

Kwestin ia i stap nomo long hed blong Itan ful nekis dei. Hem i stap tingbaot hemia yet taem we hem mo Sam, tufala i stap ron long sketbod afta long skul. Hem i stap askem hemwan long olsem wanem hem i save askem Sam long saed blong samting ia.

Nao Itan i talem: "Hey Sam! Yu yu bin fraet taem yu bin talem testemoni blong yu yestedei?"

Sam i jamaot long sketbod blong hem mo wokbaot long gras. Hem i sidaon nao i talem: "No, no tumas." "Mi bin serem testemoni blong mi long famli naet bifo."

Itan i joenem hem mo i putum sketbod blong hem long leg blong hem. "?Be olsem wanem nao yu save se yu gat wan testemoni?"

"Mi bin prea mo mi bin filim gud long hemia."

Itan i agri wetem hed blong hem mo i holem wan wil long han blong hem. Hem tu i wantem filim olsem.

Long naet ia, taem haos i tudak mo i kwaet, Itan i nildaon long saed blong bed blong hem blong prea.

Hem i talem: "Papa long Heven, plis helpem mi blong gat wan testemoni. Helpem mi blong save se Jos i tru. Se Josef Smit i wan profet. Mo se Buk blong Momon i tru."

Long medel blong prea blong hem, Itan i stop. Hem i tingting smol taem. Afta i askem hemwan: "Hey, be ?mi save wan samting finis o no yet?"

Mo afta, wan filing we i kwaet, i gat pis i kam long hem. I no wan strong filing we i bonem hat blong hem. Be Itan i bin save se, *hemia nao* i Tabu Spirit.

Wan tingting i kam long maen blong Itan: "Mi save se mi save." Taem tingting ia i kam long hem, hem i bin luksave se hem i bin filim filing blong pis ia bifo.

Eni taem we hem i stap ridim Buk blong Momon, hem i bin filim se i gud mo i stret. Nao, hem i bin save se filing ia i Tabu Spirit we i stap testifae long hem. Taem hem i go long Jos, mo hem i filim se i gud mo i stret blong stap long jos, hemia tu i bin Tabu Spirit we i toktok long hem. !Hem i bin kasem wan testemoni finis!

Hem i no bin save evri samting naoia. Be hem i bin save se Tabu Spirit i tru mo i save helpem hem blong gohed blong bildimap testemoni blong hem.

Itan i stat blong prea bakegen. Be long tetaem ia, hem i blong talem tangkyu. ■

*Man we i raet i stap long Yuta, YSA.*